

Atséméno

Bova tuoks papratéms važiouté sereduom i torgo Īlakiūs. Vèsè laukdava sereduos – è dèdèlè èr mažè. No ne kuožna sereda važioudava, bov daug darbū ūkie.

Pakinka Papunis arkli, tou katros mitriesnis. Bova tuoks vardo Puksis – èr abodo so Mamo èšvažiavuov. Mama veždava kiaušius a sveista pardoutè, vuo Papunis – grūdū, je atlèkdava. Pardavè, kou atvežè, eidava pas žīdieli. Reikiejè è droskas, è čierčèku, è žibala, è sèlkès pas žīdieli bova pègesnès. Papunis vakū kartās paklausdava, kū parvežtè èš seredas. Bovuom šèšè vakā. Vaikoitè vèns praša pilkas, kèts ledžingas, trets pèilieli nopèrktè. Mergoitè praša mamas štonšku i plaukus nopèrktè. Neveskou noperkdava, nebova daug pinigū. Vuo peilieli parvež. Džiaugies vāks – druožinieje èr druožinieje. No neélgā. Bova žeima, èšejè i lauka, peilieli èsèkèša i kèšenè. Èr káp tèn bova – a kèšenè bova kiaura, a pru šali prakèša, nes peilielis prapoulè. Vāks dèdèlè altaravuojuos èr kriukè. Papunis noramèna sakīdams, ka atēs pavasaris, notèrps snèigs èr atsèras peilielis. Vèsèms tēp gal notèktè: è dèdelèms, è mažèms.

Mama veina paponiaus nenuorieje leistè važioutè i sereda, ka neožsokto i traktierio. Vuo nuorieje sosètèktè so sosiedās ne vèin torgou, vuo èr pri čierkas, kamè galiejè pasèrokoutè vīrèškā, aple kū pri muotrèšku nepasèrokousi. Tumet neberūpieje nomėj èr skobietè.

Torgos bova miesta vèdorie pri bažnīčès. Sovožioudava ūkininkā èš vèsū kaimū aplinkou Īlakius. Vuo par atlaidus sostatīdava bagamaziu so vèsokès tavuorās. Atsémèno, mon, musintās, bova pènkè metā, ka važiavuom i atlaidus. Èšejèi èš bažnīčès, ejuom apveizietè baguomazu. Nosètvieriau ož mamas jopelès, ka nepasèklīstiuo. Vuo baguomazu bova tèik daug, ka nespiejuom vèsū apveizietè, skobiejuom važioutè nomei, ta nopèrka tiktās baronku. Nomèi laukè darbā, šeimīna èr mažèjè vakā.